

# Txirritola

ARAMAIO / Barikua / 2003ko maiatzaren 23a / 65. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02


## Gai dezente agintaldiko azkeneko osoko bilkuran

UBANE MADERA

**Agintaldiko azkeneko osoko bilkura egin zuen udalbatzarrak eguaztenean, hilaren 21ean. Besteak beste, herriaren gaineko webgunea eta bideo produkzioa izan ziren berbagai.**

Azken urteotan Aramaioko Udalean jardunean ibili den udalbatzarrak agur esan zion lan horri eguaztenean, hilaren 21ean.

Baina, hori baino lehen, gai zerrenda luzea landu zuten zinegotziek. Besteak beste, *Lurgorri*-ri egindako omenaldiarengatik esker ona adierazi zuen udalbatzarrak. Horrez gainera, jakinarazi zuten zinegotziek ikusi dutela Producciones B30 enpresak Aramaioren gainean egindako bideoa. Horrez gainera, Aramaioren gaineko webgunea egin du Goiena Komunikazio Zerbitzuak; hain justu, osoko bilkuran horren berri ematez gainera, jakinarazi zuten datorren eguenean, hilaren 29an, webgunearen aurkezpena egingo dute-



Datorren agintalditik aurrera erabat aldatuko da Udal taldea.

la, 18:30ean, kultura etxean.

### DIRULAGUNTZAK

Bestelako gaien artean, San Martin Eskolako eta Arexola auzoko

lanak ere landu zituzten; eta auzolanerako, kultura jarduerak sustatzeko, euskara ikasteko eta eskola-garraioko dirulaguntzak ere jorratu zituzten.

## Bareako pilotari gazteak txapelketa jokatzeko dabilta

Maiatzaren 9an hasi eta ekainaren erdialde ingurura arte Pilota Txapelketa jokatu dute Bareako pilotariak. Taldeko gidari

Enrike Axperen esanetan, urtean barrena ikastaroan dabilta mutikoei euren zaletasuna osatzen laguntzeko antolatu dute txapelketa, ETB Kantxa saria jokatzeko delatxatuta.



Ekainaren erdialdean arte egongo dira pilota partiduak pilotalekuan.

### MUTIKO MORDOA


Hala, 25 bat mutiko parte hartzen dabilta txapelketan. Joan den barikuan partiduak jokatu ziren, eta gaur ere hala izango da, 18:00etan hasita.

Joan den barikuko emaitzak honakoak dira: Senar-Mikel: 20/Raul-Ekain: 22; Serrato-Ander Axpe: 22/Rioja-Ruiz: 12; Manex-Markel: 12/Xabi-López: 22 eta Bingen-Iñaki: 19/Asier-Aitor: 22.

Gaur, barikua, berriz, honako partiduak jokatu dituzte: Serrato-Axpe/Senar-Mikel; Ruiz-Rioja/Raul-Ekain; Iker-Igor/Asier-Aitor; Bingen-Iñaki/Manex-Markel.

Horien ostean ETB Kantxa sariako partiduak jokatu dituzte, 21:00ak inguruan.

## Manex Agirre finalean egongo da, Gasteizen



U.M.

**Manex Agirre aramaiarra Gasteizko Printzipal antzokian jokatu den Arabako Bertsolari Txapelketako finalean egongo da. Zapatuan lortu zuen finalerako txartela, Amurrioko finalerdian. Saioan parte hartu zuten sei bertsolarien artean Zigor Enbeitak lortu zuen puntu gehien.**

Xenpelar Bertsozale Elkartek emandako informazioaren arabera, Zigor Enbeitak 228,5 puntu eskuratu zituen Amurrioko Zarabe Institutuan, hasieratik bukareraino egindako saio erregularri eta txukunari esker; bigarren Juan Mari Juaristi izan zen, 217 punturekin. Zortziko nagusian eta txikian oso lan polita egin zuen; eta hirugarren Manex Agirre izan

zen, 212,5 punturekin. Ofiziotan ondo ibili zen Manex Agirre, eta batez ere zortziko txikian jaso zituen entzuleen txalo beroenak.

### FINALERAKOAK

Amurrion jakin ziren, gainera, ekainaren lehen, 17:30ean, Gasteizko Printzipal antzokian egongo diren sei bertsolarien izenabizenak: Asier Otamendik (232,5) Zigor Enbeitaren (228,5), Oihane Perearen (218,5), Juan Mari Juaristien (217), Ruben Sánchezen (216,5) eta Manex Agirreraren (212,5) aurrean defendatu beharko du izaz eskuratu zuen txapela.

Hortaz, Andere Arriolaberagoak eta Iker Agirrek ez dute lortu finalerako sailkatzerik. Hala, ekainaren lehen Aramaio Manex Agirrerekin egongo da. Ea, bada, izaz joan zen zaleen autobuskada gaitzen duten aurret!

## LABUR

### Areto futbola eta neguko zinema bukatzean daude aurtengoz

Apurka-apurka bukatuz doaz ikasturtean barrena egiten diren ekimenak: areto futboleko, nesken moduan, kadete mailako mutikoen ere bukatu dute aurtengo txapelketa. Hain zuzen ere, 8-4 gaitu zuten Laudioko Ikastolaren kontra denboraldiko azkeneko partiduan; gazte mailakoek, berriz, 6-7 irabazi zioten Izarra Gorri taldeari; eta bihar, zapatua, Aguraingo Oriamendi Lezaola taldea izango dute aurrez aurre, Aramaion, 11:30ean.

Zinemari dagokionez, kasu horretan ere datorren astean bukatuko da neguko zinema denboraldia. Azarotik maiatzaren amaierara arte izaten da neguko denboraldia eta uztailetik irailaren amaierara arte, udakoa. Edozelan ere, neguko denboraldia bukatu baino lehen bi film emango dituzte: oraingo domekan *Grease* filma emango dute, DVD formatuan, azken asteotan moduan.

M25 / ARAMAIORAKO EGITASMOAK



EAJ/EA

## Herria biziberritzea eta hirigintza dira ildo nagusiak

► **ERRONKA GARRANTZITSUA**  
EAJ/EA koalizioarendako oso garrantzitsua da Aramaio herri dinamiko eta bizia izatea. Horrez gain, hirigintzarekin lotutako gaiet eman die garrantzirik gehien:

► **ARAMAIORAKO**

Honako 11 ekintza proposatzen ditu koalizioak Aramaiorako: Eguzkierripako azpiegiturak; babes ofizialeko 44 etxebizitza eraikitzea Ibarren; etxebizitza horien bi solairutan aparkalekuak egitea; Arexola-Arriolako azpiegiturak; Arexolako plaza zolatzea; Oletako plaza eta eliza inguruak zolatzea eta errepeidea guarda-etxeraino luzatzea; Udaletxearen barru aldea berritzea; Matxain kalea zolatzea, industrialdea sortzea eta garatzea eta nekazaritza gunetako postontzien araudia ezartzea.

► **BATZAR NAGUSIETARAKO**

Bestalde, Diputazioaren babesa lortzearen garrantzia aipatzen du koalizioak; horren harira, Iñaki Nafarrate aurkeztu dute Batzar Nagusietarako. Baina, horrez gain, honako puntuok ere proposatzen dituzte: hauteskunde legea aldatu eta betiko zazpi koadrilak berriro ezarri, *Tierras Esparzas* delakoa ezabatuz; Madrildo ildoetatik aldendu eta duela lau urteko autonomia berreskuratu; nekazaritza guneen garapena, Arabako herrietan bizi direnak bigarren mailako herritarrek izateari uzteko; Zerbitzu sozialak garatzea; Euskadiren bakea eta normalizazioa lortzeko Ibarretxeren Plana ezartzea; eta bukatzeko, koalizioak dio elkarrizketa eta eskubide guztiakiko errespetua eskaintzen duela eta gertu dagoela indarkeria gaitzesten dutenekin normalizazioaren alde lan egiteko.



HAMALAU

## Hirigintza, ingurumena, kultura, kirola... Proposamen asko

► **PROPOSAMEN UGARI**

Hamalau proposamen ugari gauzatzen ahaleginduko litzateke alkatetzan egoteko eskubidea izango balu. Labur-labur emango dugu horien berri.

► **UDALARI BEGIRA**

Oro har, herritarren parte hartze zuzena defendatuko lukete, erreferenduma, elkarrizketa eta antzerakoak ildo moduan erabilita. Baserri auzoak aintzat hartuko lituzkete eta Oletako mahai elektoral berreskuratzen saiatu, besteak beste.

► **ARAMAIORAKO**

Honakoak gauzatuko lituzkete: hutsik dauden etxebizitzak betetzeko planak abiarazi; ingurumena errespetatzen duten enpresak sortzeko eta erakartzeko industrialdea sortu; gasifikazioa herri osora zabaltu; teknologia berrien sarea ekarri; kultur eta kirol instalazioak behar bezala mantendu eta behar berrietara egokitu; kiroldegien kanpo aldea egokitu, erabili ahal izateko; eskola behar bezala zaindu eta ospitale zaharrari eta hiltzeari irtenbidea eman.

► **HERRITAR MULTZOAK**

Hirugarren adinekoak dituzten familiendako laguntzak proposatuko lituzkete, eta etxebizitza babestuek egitea. 0-2 urteko umeendako udal haur eskola abiaraziko lukete; gazteen ekimenak bultzatuko lituzkete; andreen eta gizonen arteko berdintasunaren alde jardungo lukete eta herriko presoei eta haien senideei laguntzak eskainiko lizkiekete.

► **BESTELAKOAK**

Horrez gain, zergak neurrian igotzea, nekazaritza planak abiaraztea, kultur eta kirol taldeak indartzea eta euskararen alde egitea ere gurako luke Hamalauk.



PSE-EE

## Hirigintza lanei eman die garrantzia PSE-EEK

► **KALITATE HOBEA**

Lehenik eta behin, PSE-EEK adierazi du Arabako herri guztietan aurkezteko erabakia hartu dutela, sozialisten aldeko botoa eman gura dutenek hori egin ahal izateko. Horrez gainera, alderdi sozialistak lehentasuna eman gura die azpiegiturak hobetzeari, horrek herritarren bizikaltatea hobetzea dakarrelako. Eta hori lortzeko, PSE-EEK uste du erakundearen arteko harremanak hobetu egin behar direla (Udala, Diputazioa, Eusko Jaurlaritza). Batez ere, Aramaio Udalaren eta Arabako Foru Aldundiaren arteko komunikazioa bideratu gura du. Udalari begira, berriz, herritar guztiak egindako eskaerei kasu egin beharko lieketela uste du.

► **ARAMAIORAKO**

Edozelan ere, Aramaio-ko proposamen zehatzak ere egiten ditu. Guztiak ere hirigintzarekin lotutako egitasmoak dira. Honako hauek: Eguzkierripako ur sarea eta saneamendua hobetzea; Errotabarrin dauden argindar, telefonia eta gas azpiegiturak kanalizatzea; Untzillan eta Errotabarrin ur zikinen sarearen eta saneamenduaren zati bat berritzea; errepeideak eta bestelako bideak, oro har, berritzea, batez ere Matxain; Ibarretatik Etxaguenera doan A-4025 errepeidean eta Gantzagarako A-4028 errepeidean hobetze lanak egitea; Muruko errepeidea eta harri-lubeta zabaltzea. Uribarriko errepeidean drainadura egitea; Andra Maritik Ibahe eta Maskarriano baserrietara doan bidea zabaltzea eta hobetzea; Gatzikarro baserrirako bidea hobetzea eta Arexolako plaza urbanizatzea eta zolatzea eta azpiegiturak hobetzea.



PP

## Ordezkaritza lortu gura du; baita turismoa indartu ere

► **ORDEZKARITZA LORTZEA ARAMAION**

Alderdi popularrak Aramaio-ko duen helburu nagusia ordezkaritza lortzea da, orain arte ez du izan-eta zinegotzirik. Behin hori lortuta, honako lau puntuok dira garrantzitsuenak PPko ordezkarientzako:

► **EMAKUMEAK**

Arlo honetan, emakumeendako ikastaroak proposatzen ditu; beti ere, enpresen behar errealak kontuan hartuta antolatutako ikastaroak izango lirateke.

► **GAZTEAK**


Alderdi popularrarendako garrantzitsua da jende gaztea Aramaio-ko erakartzeko. Hain justu ere, ibarreko eta inguruko gazteendako ardatz bilakatu gura dute Aramaio. Horretarako bi ekimen proposatzen dituzte: babes ofizialeko etxebizitzak eraikitzea, batetik. Eta, gazteendako ekintzak antolatzea, bestetik.

► **PERTSONA NAGUSIAK**

Eta, nagusiak ahaztu barik haiekiko arreta bultzatu gura du. Horretarako, etxez etxekok zerbitzua hobetzea proposatzen du; eta pertsona nagusiendako egoitzetan arreta zentroak eta eguneko zentroak bultzatzea.

► **TURISMOA ERAKARTZEKO AUKERA HANDIA**

Eta, bukatzeko, Aramaio-ko promozionatzeko eta bisitariak erakartzeko aukera handiak dituela uste du PPK, eta hori indartzea proposatzen du. Horretarako Aramaio-ko dauden ostalaritzako azpiegiturak eta azpiegitura turistikoak bultzatzea proposatzen du. Turismoa bultzatzeko plan eraginkorrak abiaraztea proposatzen du eta bisitariak erakartzeko ekimenak.



UA

## Araba Nafarroa moduan: Arabako Estatutuaren aldeko apustua

► **PROGRAMA OROKORRA**

Hasteko, esan beharra dago Aramaio-ko programa eskatu arren, Unidad Alavesak Arabako duen programa orokorra bidali digula. Hortaz, hor zehazten dituen ildoak aipatuko ditugu labur-labur.

► **ARABAKO ESTATUTUA**

Araba Espainian integratutako autonomia erkidegoa da, eta Arabako autonomia eratzeko oinarri moduan estatutua proposatzen dute arabarrendako. Autosufizientzian oinarritutako Araba izatea gura dute, eskumen gehiagorekin. Horren barruan, adibidez, Batzar Nagusiek parlamentu izaera izatea gura dute, eta Araba modu askean atxikitzea Euskadiri. Horretarako, herri-kontsulta egitea proposatzen dute. Oro har, Araba nazionalismoarekiko muga naturala izatea gura du Unidad Alavesak.

► **ESKUBIDEAK**

Hortik aurrera, UArendako herritar guztiak dute eskatasunerako eskubidea; familia bat osatzeko eskubidea (lana eta etxebizitza edukitzeko eskubideak aipatzen ditu); familiak babesteko eskubidea (geroago eta nagusiagoak garelako kontuan hartuta, errealitate horretara egokitze bideak proposatzen ditu); sexualitatea modu librean bizitzeko eskubidea (modu guztiak errespetatuz); gizarte eta medikuntza aldetik erantzun egokia jasotzeko eskubidea; hezkuntza eta kultura izateko eskubidea (kultura modu orokorrean landu eta euskal kulturari lehentasuna eman barik), besteak beste.

► **BESTELAKOAK**

Era berean, errepeideak konpondu gura ditu eta nekazaritzarako egitasmoak landu, besteak beste.